

DISKURSU SUA EXSELÉNSIA SENHOR PREZIDENTE PARLAMENTU NASIONAL

Dr. Aniceto Longuinhos Guterres Lopes

Iha okaziaun Komemorasaun Loron Feto Nasional

Excelencia Prezidenti Grupo das Mulheres Parlamentares de Timor-Leste (GMPTL) no
Secretaria da Meja do Parlamento Nacional, Senhora Deputada Lúcia Norberta
Excelencia Secretária de Estado de Igualdade e Inclusão, Senhora Maria José Fonseca
Excelencia Primeira Dama, Senhora Cidália Mousinho Guterres Lopes

Senhoras e Senhores convidados,

Komemora Loron Feto Nasional lori ita ba hanoin hikas feto sira iha comunidade ka sociedade timorense iha periodo sira liu ba kotuk. Komemorasaun ne'e konvida ita hotu atu halo mos reflesaun iha aspetu boot tolu: feto iha humanidade, feto iha evolusaun sosiedade ida-idak no feto iha revolusaun politika no dezvoltamentu nasional. Tematika boot tolu nebe hau sei la elabora ida-ida iha biban ida ne'e, maibe ida-idak bele halo reflesaun individual kona ba tema hirak ne'e. Hau hakarak koloka no sublina deit katak essencia husi assuntu ida ne'e mak "ser humanu ka ema ida deit mak iha generu rua: iha feto no iha mane nebe moris iha artikulasaun komplementar". Ida-idak, tantu feto no mane, iha nia kapasidade singular ka iha nia valia nebe motiva malu hodi komplementa malu, nune'e forma sosiedade humana nebe dinamika no integrada. Infelizmente, historia humanidade no sosiedade ida-idak hatudu katak feto mos sofre tratamentu nebe injustu no violentu nebe sei persiste iha sosiedade balu too agora. Ne'e la signifika mane la sofre, maibe iha okaziaun ida ne'e fo atensau liu ba feto nia situasaun.

Ciente no preokupa ho situasaun ida ne'e mak ohin loron kestaun igualdade generu kolokadu transversalmente iha dezvoltamentu social, politiku no ekonomiku paiz ida nian. Timor-

Leste fo atensaun ba estrategia ida ne'e no hatudu nia kompromisu desde restaurasaun independencia iha 20 de Maiu 2002. Too ohin loron Timor-leste hatudu duni partisipasun fetu iha vida sosial-politika nebe as liu (kuaze 30%) iha Asia.

Assuntu partisipasaun fetu aborda iha perspetiva igualdade generu, signifika laos eksklusivu fetu nian problema maibe sosiedade tomak nebe kompostu husi fetu no mane nia problema. Iha perspetiva ida ne'e hau hakarak foti Martha Graham, coreógrafa no professora dança moderna, americana, nebe dehan katak ita ema iha talentu singular ka iha keunikan, no wainhira la atualiza potencia ida ne'e, singifika ita lakon ona buat ruma" iha ita nia moris. Martha, ema nebe consegue halo kombinasau harmonioza entre respirasaun, movimentu, gestos no kontaktu iha dansa, nebe halo estilu dansas sai arte nebe fo vantagein sosial no ekonomiku.

Senhoras no Senhores Convidados

Iha aspetu importante rua husi esperiensa Martha Graham; ida kona ba "singularidade ka keunikan, ida seluk mak kombinasau harmonioza" hau koloka aspetu rua ne'e iha komemorasaun Loron Feto Nasional no tema "**Promove partisipasaun fetu iha nivel foti desizaun no lidera ba mudansa inkluziva**" nebe GMPTL fo.

GMPTL nudar mekanismu dinamizadora ida nebe hamrik iha parte inan-fetu sira iha Parlamentu Nasional atu promove partisipasaun, foti desizaun no inkluzividade. Ba assuntu ida ne'e hau hanoin ema hotu-hotu bele halo. Saida mak GMPTL bele no tenki halo nebe hau hakarak sugere mak deskobre uluk singularidade ka keunikan husi GMPTL nudar orgaun koletiva ida nebe hatudu diferensa husi orgaun sira seluk nebe intervein iha assuntu igualdade generu. Nia potencia singular ne'e mak sei marka diferensas iha nia intervensoens iha assuntos sosial, politika no ekonomika liu husi kompetencias konstitusionais Parlamentu

Nasional nebe ikus mai sei fo impaktu ba sosiedade Timor-Leste. Feto Timor-Leste hatudu ona sira nia kontribuisaun lobuk ba país ida ne'e, maibe seidak trata loloos hanesan potencia virtuoza ba sosiedade tomak nia moris diak, maibe, sei sai deit hanesan objetu politiku ka politizadu. No iha momentu balu lakon tiha sentidu komplementariedade entre feto no mane. Ita presiza hamoris fali valor sira nebe hatudu tiha ona iha ita nia perkursu historiku.

Timor-Leste nia historia revolusaun sosial no politika nebe hahu iha inisius tinan 1970 too rezistencia hasoru Indonesia hatudu feto sira nia partisipasaun ativa iha vida politika, iha vida sosial, hamanitaria, iha luta armada, iha klandestina no luta politika diplomatika. Ita presiza enkuadra esperiensi hira ne'e nia valores iha konstrusaun Estadu no iha rekonstrusaun sosiedade foun Timor-Leste. Deskobre no rekones singularidade kolektiva feto Timor-Leste nebe hatudu ona iha Timor-Leste nia passagem historika. Deskobre no rekones mos singularidade mane Timor-Leste hodi forma kombinasau harmonioza potensias nebe eziste iha feto no mane hodi dezenvolve sosiedade Timor-Leste nebe justa, prospera, solidaria no fraterna.

Espasu primordial nebe merese atensaun no intervensaun seriu no indispensavel mak familia ka uma-kain nebe, sai selula sosiedade. Iha ne'e mak meta dezenvolvimentu nasional, iha ne'e mak GMPTL nia area intervensaun mos, iha ne'e mak ita hotu-hotu nia papel ba promove igualdade generu hodi atingi sosiedade nebe justa, prospera, solidaria no fraterna. Familia ida-idak nia nivel igualdade generu, nia moris justa, prospera, solidaria no fraterna mak hatudu sosiedade Timor-Leste tomak nia nivel iha aspetu hira ne'e.

Nudar Prezidenti Parlamentu Nasional hau konvida hotu-hotu, tantu individu ka institusional atu iha komemorsaun Loron Feto Nasional ne'e hatudu ita nia homenagein ba ita nia inan no feton sira nebe dedika an tomak ba Timor-Leste nia libertasaun no independensia, sira nia kontribuisaun ba dezenvolvimentu. Konvida ita hotu atu hare no trata

familia ka uma-kain nudar fatin ita nia misaun direta ba dezvoltimentu sosiedade nebe moris iha prosperidade holistika. Parabens ba inan, feton no alin feto sira hotu.

Tenho dito

Obrigado!